

四庫全書

集部

欽定四庫全書

集部

甬上耆舊詩卷十九

二十九

詳校官石中允臣薩敏

主事銜臣徐以坤覆勘

總校官麻吉士臣朱餘

校對官編修臣盧遂

謄錄監生臣周克鵬

欽定四庫全書

甬上耆舊詩卷十九

監察御史胡文學編

禮部屠長卿先生隆

先生別字緯真亦號赤水少時其家少司馬竹墟公  
數稱為異才司馬嘗夜夢蒼龍入室及旦起先生適  
至心益竒之日與大司馬東沙張公共相延譽名益  
重中進士除潁上知縣調青浦在官建二陸祠延接

吳越間名士沈嘉則馮開之諸公泛舟置酒青簾白舫縱浪泖浦間以仙令自許然于吏事不廢嘗有部使者入縣言靈雨久苦今日行水啟閘得田苗無恙先生對曰公所見負郭者耳他汙邪滄沒甚多令何敢隱民疾苦以此欺公使者絕嘆服稍遷禮部主客司主事進郎中其在曹好客益甚而橐中屢空時解帶付酒家稍取供客王季夏太史為作銷帶行紀之西寧宋小侯少年好聲詩相得懽甚兩家為曲宴杯

開燭滅每極子夜遂中白簡解組歸過吳中由拳父  
老為斂田千畝奉故侯請從泖浦卜居先生但與飲  
數日謝歸自束髮名高睥睨當世為詩文任心縱口  
以此自豪嘗集詞人四座戲為葉虞叔咏松齋李之  
文咏芙蓉池各限數百字言笑中須臾卮酒二詩並  
成又與客對弈口誦詩文我誦彼書書不逮誦自叙  
其所作以為姿敏而意疏姿敏故多疾給意疏故少  
精堅今所傳由拳白榆采真南游諸集皆未嘗具草

之筆也既不仕乃遨遊吳越間歎咏山川自矜出世已而溯盱江登武夷窮八閩之勝阮堅之為晉安司理以癸卯中秋大會詞客于烏石山之隣霄臺名士宴會者七十餘人而先生為祭酒黎園數部觀者如堵酒中樂止先生幅巾白衲奮袖作漁陽摻鼓聲一作廣場無人山雲怒飛海水起立林茂之年少下坐先生起執其手曰子當作搥鼓歌贈我快哉此夕千古矣已稍倦游歸里門客益輻輳每置酒不過一更

輒更然燭坐齋中填樂府詞十餘紙命善歌者王子  
長為定點拍唱之隨去其繁者自脫手至上口時所  
存率十之四有御史行部遣吏白旦日早臨家人請  
脩具然先生實無一錢且偃卧榻上家人不敢復請  
日向昃適西陵某公遣使者來購文以白金具札為  
壽先生即起召使者入問發緘立撰文併作報書遣  
使出門日景未盡即以金盡付家人不啟視及晚年  
家益貧更出游人間阻凍金閭作歌從李叔立乞米

自嘲自戲讀者憐之復留連虞山狼五間判年始還  
未幾遂寢疾先是吳人孫榮祖挾乩仙稱慧虛子先  
生篤信之及疾革猶扶牀凝望幾慧虛廳輪迎我悵  
快而卒得年六十三其未行世詩文名絳雪樓集尚  
數十卷藏于家

先生異才天縱橫視古今里中父老傳其飲中下筆  
杯影尚搖歌聲初轉一揮已滿四座盡傾莫問得傳  
千載只言取快一朝亦既極詞人之豪矣先生論詩



謂杜陵自有高妙獨立處今人徒尚其麤樸豈為知  
杜陵者可稱篤論生平北面沈嘉則先生推其七言  
古詩海內獨步故先生于此體步驟亦適相近當其  
意得處山奔海立斯亦一奇也余嘗謂錄古人詩要  
當于彼法取其獨擅者耳近家選長卿僅存一律復  
非其所意得使前人才氣于何得伸竟陵錄溫李詩  
欲全以我法掩彼風華然溫李亦何可掩也余既定  
屠先生集合于虞山所選讀之始一快時謂李供奉

而後先生一人而已正以其才略同也

短歌

喬木多陰曠士多懷憂來無端西風鳴哀

一解

無登高臺以望絕遠浮雲紛馳白日何短

二解

晨登崑崙以臨具茨四海雖廣不容鬚眉

三解

太行可登海水難測裋褐行歌若出金石

四解

善哉行

來日大難地耄天荒花開不飲葉墮空傷

一解

秦望三山以臨洪波金棺之下白骨莪莪

二解

富貴無常霏雲流霞時移運謝王侯布瓜

三解

人有美酒天有良宵何以為驩打鼓吹簫

四解

暢適豈誕沈寘不昏客來笑歌客去偃門

五解

世人無稽盛言八公起眎茫茫白雲在空

六解

### 震旦篇寄呂充符

吾聞九州外別自有神庭二曜未曾到四照花常明  
瑤臺萬玉戶玉戶開崢嶸蒼虎守階阼桂樹夾兩楹  
靈藥

無不有瑤草冬夏青  
神人何曠朗幡幢光爛盈  
容顏冰雪皎衣裳雲霧輕  
所語非世事恍忽而噌吰  
口不設毀譽心不藏愛憎  
吻距靡傷害澹然寡櫻營  
但感滄海變不問人代更  
昧者謂迂誕曲局安足傾  
此土本穢濁傷哉朝菌榮  
何當煉金骨白日翔太清

臨淮曉發

行邁一何早驅馬出郭門  
馬足踐巖霜北風厲寒原  
時方屬青陽褐衣苦不溫  
側身望四際烟沙莽相屯  
落月

白無色天星麗以繁山川曠蕭條霜露空草根何人驅  
馬來疾如流星奔但各東西馳不復交一言傷哉行路  
難逃矣勞心魂

聞沈嘉則先生與汪長文游四明山作

四明迴竒絕獨立東南州上與元氣合下見滄海浮烟  
霞日莽互何人窮其幽二君策高足能為十日游白雲  
度千嶺青天開雙眸捫星帝座近得句山靈愁倦來臥  
蘿月海風吹蕭颺洞天闕瑤草何時尋丹丘

南滁大雪歌

昨日何日故人一尊虎丘月今日何日馬頭十丈南滁  
雪昨日何日金陵管絃喧酒家今日何日關山石裂穿  
寒沙從來雨雪多江北回首江南淚沾臆所以古人憶  
河梁昨日之尊那可得西風太有權濁酒都無力冷如  
鬼手捉馬鞭狐裘蒙茸亦何益寒山日落牛羊眠往往  
茅屋見人烟茅屋人家絕可憐黃茅颭出青松顛自住  
山上屋還耕山下田童子撈魚溪水邊女兒賣酒工數

錢三家五家自來往年深不問城市遷門前雪花大如  
手萬片瓊瑤寫枯柳火煨楮啖蹲鴟藜羹麥飯地黃  
酒生游死葬寒山下一生不向長安走而我胡為冰雪  
中馬蹄踏破行千峯繁華富貴轉眼空山中之人笑殺  
儂

沛縣登歌風臺弔漢高祖

彭城沛邑漢帝宮山川峭拔風土雄三月驅車猶烈風  
高天捲沙白日蒙牛羊散野城郭空我來不見隆準公

但見平原草綠寒花紅隆準公英雄哉亭長去帝王來  
去時蕭蕭提一劍來時千騎萬乘驅雲雷椎牛置酒燕  
湯沐黃屋左纛虹霓開前殿歌風氣逾猛後宮擊筑聲  
復哀百官歡呼父老醉酒酣日落登高臺當時王氣收  
豪傑霍然起他人裂土握重兵公也倉皇奔迫不得止  
須臾劍光奮義旗指函谷一破子嬰死鴻門不能驚巴  
蜀不能喜黃石為之用白帝當之靡韓彭如狙項如豕  
往來大業五載耳世上英雄有如此吁嗟乎咸陽宮殿



空蒼烟彭城故都無墓田神州赤縣掌上懸公也歸來  
奏管絃管絃歡娛歡不足急雨飄風一何速沛上山河  
已非漢邑中父老死相續故宮曾無片瓦覆藤蘿倒挂  
野人屋歌風之碑烟霞磨滅不可讀遙望芒碭鬱乎高  
丘青天不動黃河流大雲垂垂幕其上龍蛇虎豹紛蚩  
尤千秋萬歲後魂氣當來遊

山中吟

我家海上之青山山頭白雲時往還藤梢細月行花裏

水濺空巖洒竹間仙源有路春常入石屋無門夜不關  
踏花只共野人語蕩槩真如沙鳥閒自從奔走江南道  
馬蹄半入紅塵老生平耳目非我有俯仰眉嫵向人好  
歲月其如石火何却逐浮名喪至寶昨夢丘中人題書  
寄深省既報青山空復言白雲冷山空雲冷胡不歸荒  
猿叫破秋天暝四明迴合無風塵八窗高敞開星辰洞  
簫泠泠響空碧凌雲一喚樊夫人樊夫人偕雲華不知  
何年栖紫霞十洲三島俱為家粲然忽啟玉齒笑笑我

不歸寂寞羞桃花  
桃花爛熳紅映天  
垂楊婀娜春風前  
野麋亂飲幽澗水  
仙鼠倒挂洞門烟  
偶因騎馬衝泥去  
憶得鋪花掃石眠

劉御史歌

丞相怒烈士戍驄馬來  
烈士穴陰風蕭蕭神靈哭不止  
黃沙荒荒烈士死吁嗟乎  
劉御史遼陽天黑白日沒下  
有狹偷上有鵲磨牙鑿齒據  
其窟山鬼不敢弔河伯不  
敢出妻子那及收骸骨  
嗚呼噫嘻何人殺孔融  
何人殺

臧洪男兒出身報天子俯首屈死蓬蒿中雲旗獵獵紅  
滿空天兵下來衝烟虹將軍十道開寶弓誰當迎御史  
上帝特遣闕龍逢闕龍逢握公手釀天河挹北斗拂公  
塵埃飲公酒人間險巖天上否遊戲白玉堂逍遙黃金  
牖椒山青霞亦公友自公去矣廓氛霾天清地朗雲霧  
開墓前銅雀化為灰塞外金雞謫戍回公不在矣使心  
哀我哀何為公不答仰視高空寒颯颯白雲蒼茫九關  
合乾坤轉轂人事遷天子下詔褒忠賢鬼蜮射人虹霓

障天殲我烈士古路邊榮以大官寵大篇子孫仍賜絲  
上田蕙毅桂醴焚紙錢年年寒食墓門烟

青谿道士吟留別京邑諸遊好

青谿道士餐白石掃地焚香坐空碧月映蒹葭秋水寬  
雪覆楫欄暮雲坼山深路僻無人烟沙冷天空留虎跡  
可惜一朝不自堅來作朝中蘭省客烈日騎馬堀堞中  
搔首乾坤嗟迫迮下筆連蜷雌霓氣吐舌夭矯丹霞色  
雄心不除俠骨存十年學道亦何益何物美器橫相如

藉藉聲滿長安陌長安大道連平沙王侯戚里紛豪華  
銀臺畫閣三千尺繡箔珠樓十萬家省郎卜居窮巷裏  
車馬趨之若流水爭設瓊筵借彩毫朝入西園莫東邸  
搞詞盡道李王孫執轡皆稱魏公子主人轟飲醉向天  
淋漓紅燭落花前銀漢半斜沈夜柝繁霜歌罷彈哀弦  
有客醒然不御酒獨擁香爐對暝烟吁嗟乎美服人所  
指器盈神理殃為歡尚未畢含沙已在旁匹夫睚眦脩  
匕箸惡聲狺狺安可量子蘭讒屈平登徒毀宋玉請奏

相如琴未滅淳于燭禰生鼓吏慙未能幼輿丘壑無不  
足青天何高高白日去莽莽出門眼看北邙山令人萬  
事拋滂瀆玉柙珠襦寒雨中金罍寶瑟高堂上不聞黃  
鵠遊洿池豈有神龍挂魚網我欲掩口笑古人古人英  
雄亦不達子房赤松待興漢范蠡五湖須霸越即如蒙  
莊與灌園安用雲臺懸日月馬蹄雞肋空有無欲休即  
休何所圖亦不用百官祖道集征鹵亦不用君王詔書  
賜鑑湖一騎蕭然下風雪空壕斜日啼城烏恥為執虎

子寧待車生耳懶視張儀舌不問待詔齒是非野鶴騫  
孤霞恩怨金鷄擘海水脫我今日之黃塵還我舊時之  
白雲王績罷官因坐酒介推身隱詎須文風雷不能為  
之驅陰陽不能為之鑄竒鷹翻然掣金鎖碧落茫茫墮  
秋霧銅馬當年悔陸沈自憐黑髮早抽簪當年楊柳黏  
天碧繞屋松杉滿地陰故人他日如相訪萬樹桃花何  
處尋

韓蘄王花園老卒歌和吳淵穎



中原煙塵漲天起汴城日落大旗靡翠華北去泥馬南  
坐擁西湖衣帶水斬王徒步起行間百戰馳驅劍光駛  
金牌畫分玉塞昏三字獄成岳飛死王也搯腕氣衝冠  
烏盡弓藏痛脣齒飄然角巾歸西湖自號清涼老居士  
湖邊花園春色妍亭亭百卉紅燒天守園老卒鬢髮短  
白首閒就花陰眠蕉鹿呦呦蝶栩栩石頭為枕苔為氈  
黑甜正熟履綦響王來蹴起始矍然頭顱若此隙駒過  
長日如何只高卧相公勿輕灌園人渭濱垂釣淮陰餓

龍泉補履鎌刈葵閒却英雄無事做王歎此叟氣何豪  
與爾十萬金錯刀青雀樓船貫月上紅牙歌吹過雲高  
少女如花雜賓從鬢髻白髮炤錦袍口銜叵羅海霧捲  
手揮如意江風颭酒酣指點挂帆去鳴笳疊鼓凌波濤  
夷王倒屣迎上客市地攫綸布瑤席光生珠貝蛟人探  
寒透冰綃龍女織趙氏璧玉連十城石家珊瑚高數尺  
歸來大扁韓王欣豪傑計倪少伯倫胷中之竒聊一見  
游戲仍臥花陰春吁嗟乎古來英雄何可測駿骨往往

埋埃塵尉遲微時曾鍛鐵王猛不遇行負薪為龍為蛇  
古所嘆從此不敢輕相人

重過桃江別業

當時落拓不足論挾書醉眠桃花村黃鸝叫斷春雨色  
白鷺窺破新水痕身世冥滓游太上風物依稀似陸渾  
何人喚我出門去匹馬蕭蕭南北路兩足鞞皴涉冰沙  
雙鬢凋殘櫛烟霧燕臺駿骨雖見收漢宮蛾眉易生妬  
幻泡浮雲擲一官親蒙天子賜黃冠入山面壁終有日

對酒逢花且盡懽  
此地重來恣笑謔  
十載羈栖宛如昨  
悽愴似隔武陵雞  
須臾亦是令威鶴  
紅桃碧柳風正柔  
野浦迴塘水亂流  
輕撓鐵笛吹欲裂  
錦罽銀箏彈不休  
伯倫生著酒德頌  
無功自署醉鄉侯  
古人多好託此物  
但言澆愁吾不愁

汪長文芟荷亭歌同吳茂倩董陽明葉虞叔

山家樓閣沿溪入  
複道層階上千級  
青崖寒嵌丹房深  
栖鶻巢鷹手可拾  
夜臥不知雲霧多  
朝來但見衣裳濕

排空一步一崔嵬，陡然絕頂孤亭開。  
金沙細湧花源出，玉竦橫穿樹杪來。  
亭前日午桐陰墮，解衣烹茗焚香坐。  
山花踳躅紅半殘，野谷篔簹綠萬个。  
濺濺響水到池平，池上田田荷芰生。  
斜光冷浸玻璃濶，倒影晴窺鬢髮明。  
一時同游總廖廓，玄超名理兼清謔。  
腥風挾雨聞虎羆，絕磴將雛下猿獍。  
談宜松外塵尾懸，碁愛花間子聲落。  
此時散髮夢羲皇，世界不知何處著。  
布袍方冠意蕭野，主人恐是避秦者。  
樊榭人歸霞自青，葛玄沙冷泉猶渚。

舊是仙都好卜隣把杯共酌松杉下與爾將營采藥乎  
為余先種桃花也

神鈞篇贈李子年

吳人鑄劍天下無二子精靈雙可呼雷鳴電擊勢飛動  
夜深妖血猶模糊水犀十萬壓羅刹光閃吳鈞白如雪  
提攜在手鬼夜愁橫行東南摧越絕仰挾浮雲六合昏  
俯斫海水蛟龍奔李生才氣有如此無乃古鐵之精魂  
君不見荆卿匕首往不回終作秦王柱下灰子房偃蹇

遇黃石滅楚興劉起三尺古來英雄真不同意氣橫天  
貫白虹

阻凍金閭從李叔玄乞米歌

金閭城邊暮飛雪朔風如刀凍欲割靈骨無靈怒濤死  
沙頭黃狐弔黑獺鴛鴦僵仆禿鷲愁層冰膠舟不得發  
長年膚粟生寒瘡舟中布衾冷于鐵都城豪華萬戶連  
朱樓紅罽霜滿天公子貂裘匿匣外佳人寶袜擢踰前  
繡閣溫溫二三月飛觥行炙紛流泉興到輕身便走馬

醉來纖指猶調絃黃冠道人獨蕭瑟孤舟十日斷火烟  
此時跌坐政冥寂內餐元和嚙金液隣船翁媪無歡聲  
顧我僮奴有飢色僮奴啞然向我笑終年蒲團詎得力  
浪說成丹丹不成空談辟穀穀未辟道旁揶揄多鬼市  
天上逍遙幾仙籍棄世何羨丁令威誤人大是浮丘伯  
滿口沆瀣腹枵虛秦皇漢武飽可圖瘦得形骸已骨立  
乘鸞控鶴何時乎寧為執鞭廝養卒不願拂蓋神仙奴  
大官巨舫泊河滸日日吹笙復撾鼓道人轉受僕輩賤



汝亦為官竟何補昔恐侏儒良以卑今向監河更自苦  
前身無乃若敖鬼比日誰為翳桑主滿城盡是陶壺奴  
何處得有謝仁祖

夏日懷友人

松風消大暑長日坐高林路斷千峯合天垂萬木陰偶  
然成客夢一半是鄉心得句無人賞年來欲廢吟

春日懷桃花別業

緩步踏江村沙晴晚日暄偶然逢野老相送出柴門曲

岸隱漁吹平橋落水痕歸來坐長薄星月飯黃昏

潞河晚泊

迴浦落帆盡長堤帶郭斜暮烟平吐樹春雨薄沈沙白  
艇藏漁市黃茅覆酒家一瓢雲水外不復問年華

同胡明府登佛塔寺

風急高天迴孤亭落日閒松聲疑卷壑雲氣欲沈山古  
佛疎藤合層城獨鶴還馮茲問寥廓吾意薄塵寰

幽栖

獨愛無人處幽栖不用名竹雞啼午寂松鼠落枝輕芳  
草初平路春溪欲上城蕭然吾亦得擾擾自勞生

游澱山湖

扁舟凌紫氛蕭洒絕人羣浦暗遙吞樹湖空不碍雲浪  
推沙鳥出風挾寺鐘聞故有滄洲癖徘徊眷夕曛

彭城渡黃河

彭城臨廣岸俯仰霸圖空白日照殘雪黃河多烈風所  
嗟人向北不似水流東回首滄溟曲山山雲霧中

元夕集司馬公宅

同是春宵醉今宵樂未央  
花明天不夜塵煥月生香  
人語朱樓細簫聲碧海長  
絳河低欲沒猶進九霞觴

皂園

信是歸來好江東舊布衣  
池成蛙自聚金盡客應稀  
家以栽花冗身因食蕨肥  
野鷗飛不去吾性本忘機  
自知官况薄何以鬢毛斑  
才退名兼損家貧身轉閒  
禁方留石室副本托名山  
詎有飈車降脩脩天壤間

再送龍君起

結屋傍漁家，春溪浮落花。  
雲中漢雞犬，野外晉桑麻。  
但使心無累，寧憂生有涯。  
遊仙事非誕，真見棗如瓜。

送張君明入楚

楚國亦千里，君行入郢烟。  
僧廬衡嶽雨，騷客洞庭船。  
雁氣初沈日，鷗容盡寫天。  
江離應可搵，把酒聽哀弦。

旅懷

蹤跡寄浮萍，江湖老客星。  
吾懷猶莽蕩，天意使飄零。  
閱

世頭堪白看山眼獨青故園丘壑在歸去學沈冥

正好乘涼坐胡為觸熱行一瓢成浪跡五嶽亦虛名赤  
日林間出黃埃馬首迎有身真大患七尺役吾生

足下九州履囊中五岳圖生平負意氣不必問頭顱陵  
寢周秦道衣冠梁宋都故園朋舊在飽飯對妻孥

野曠紫叱撥山深黃粟留本為乞食去兼作采真遊汗  
漫兀乘馬逍遙杖剡鳩乾坤容放達何處不蒐裘

聞田叔罷官

薄宦二千石危途三十年猶嫌歸已晚誰道罷堪憐  
問栽花徑先尋種秫田吏廉聞似水行李定蕭然  
羽書西事急烽火達郊闕牢落悲行役艱虞想故山無  
煩嘆官拙且喜得身閒生計團蕉在憐君鬢髮斑

重熙洞

古洞千年閟靈山一夕開入門嵐作霧擊石鼓如雷地  
脈窮難盡天光照却迴孤亭當澗戶徙倚坐寒苔

潤州懷古

潮滿空濠集暮檣雁衝寒樹下迴塘清霜畫戟新屯壘  
碧血妖燐古戰場地肺三茅通白下江心一葦限朱方  
山川無恙英靈盡讀罷殘碑又夕陽

哭張大司馬

江海淒涼易夕曛東南靈氣走氤氳門前馬散留青樹  
湖上尊空弔白雲雙涕可能酬鮑叔寸心原自許徐君  
欲揮赤電捫羣帝閭闔門深哭不聞

賦得烏衣巷送周使君之金陵



春風深巷舊豪華駿馬銀鞍日未斜  
朱第空梁曾海燕  
白門垂柳自宮鴉草香輦路銷金粉  
花發江城問酒家  
君去定尋王謝宅大帆明月向天涯

嵩澤弔袁將軍

黃霧春天海浪驚斜陽江上哭殘兵  
野禽飛上將軍樹  
田父來耕滄瀆城劍蝕土花秋後老  
血侵鬼火夜深明  
羊曇清唱桓伊笛并入蕭蕭暮雨聲

永明寺與伯貞先生坐語

寺門瓦落挂霜藤  
閒與君侯說廢興  
秋老紫苔生卧佛  
日斜黃葉映殘僧  
蠹魚古壁銷千藏  
風雨空堂暗一燈  
解識此中須悟後  
昆明劫火向無憑

酬鄔汝翼見贈之作

婆娑吳越問前朝  
來往空江送落潮  
佳句全從僧舍得  
雄心半向酒家銷  
寒山到處容雙屐  
野艇無人挂一瓢  
不為西風傷歲暮  
亂雲歸去卧金焦

新鷺

初來閣外弄春暉  
上下花間試學飛  
小語未全調玉管  
薄寒深自護金衣  
龍池萬柳栖應怯  
紫殿千門見總稀  
九十韶華愁易老  
啼殘紅藥綠應肥

慈會寺贈于悅海支二上人

九月鹽官客思增  
偶來蕭寺得高僧  
寒潮滿郭喧秋梵  
老樹當門照夜燈  
萬頃鷗鳧連海筏  
千家烟雨散漁罾  
閒房一宿清如水  
夢踏蓬萊第幾層

贈李本寧廉訪

生平恥附夜郎名，斗大東方董子城。  
楚澤于今真浩蕩，越兵自古號縱橫。  
分予一半龍門客，讓汝千年牛耳盟。  
况已泛舟香水浦，避公近在蓬瀛。

石渠虎觀舊師儒，共說今官非故吾。  
人望文星高北斗，天教仙吏長西湖。  
六橋松栢埋弓劍，十里荷花泛舳舻。  
名重李邕丰采異，出門士女看傾都。

送長吉諸孫東還

年來何日不思鄉，却送君歸欲斷腸。  
聞道小園剛半畝，

不愁無地種垂楊

女瑤瑟

附

瑤瑟字湘靈長卿先生二男長金樞次玉衡女即湘  
靈俱能詩金樞娶宛陵沈氏天孫亦有才先生每詩  
成輒競相寫和所填樂府詞立唱之兼被絲竹人謂  
先生可方謝太傅家庭笑樂亦古今佳事也湘靈嫁  
為黃生玄覽婦早卒先生誌其墓刻詩曰留香草

採蓮曲

六橋垂柳兩邊分日暮吳歌隔岸聞祇解蓮花如粉面  
不知荷葉是蓮裳

澄湖日暮芰荷風白面郎君寶玦逢野水夜搖青雀舫  
却迷歸櫂水雲中

聞大人自潁上抵金陵作

靈跡從來擅建康才高多愛水雲鄉石頭城下蘆花白  
燕子磯前江月涼夜露未寒當七夕秋葵初發候朝陽  
登樓極目闕山渺腸斷蝦蟆金粉場

秋思寄玄覽

澄光涼露白商節氣蕭森愁逐朝雲亂思因夜雨沈春  
羅沾別淚秋練搗寒砧烏宿人烟冥螢飛松影深閨帷  
懷遠夢闕塞憶歸心賦就長門怨歌成團扇吟蒼茫河  
漢邈迢遞客星臨縱有高山調徒懸綠綺琴

太常少卿余漢城先生寅

先生本字君房晚年謂古君房盡非人改字僧杲學  
者稱漢城先生自兒時即異里師授句讀每為所屈

及壯益喜讀秦漢以前書倡為古文凡為名諸生二  
十餘年孝廉十二年始舉進士官水曹督製賜俺荅  
妃三孃子袍襦及犒邊士錦衣日有支發未嘗干一  
錢凡省縑及金俱貯所司人謂余水部真如水也方  
檢校六科廊廊故有度閣上貯絲綿先生嘗假息其  
下忽聞閣上大聲云余主事遷去可惜然閣上實無  
人次日命下遷禮部員外郎先生嘗謂國家一銖一  
粟俱有神明護之守者蔑視必不祥蓋指此也進郎



中上正風俗十事疏出以按察副使視學陝西請謁  
一無得入即御史所首錄士考居下下最慎鄉賢名  
宦二祠謂鄉先生非國中大賢豈得冒祭于社循吏  
尤不易得必若所祀郿令諸葛京斯不愧名杜矣京  
蓋諸葛丞相次孫也稍遷左叅政改山東居官所信  
者心所謹守者法宿講求國朝典故灼有定畫及臨  
事更問憲章若何持操廉白期為國家節用監司俱  
以費不給請先生獨否人雖陽服之而心齟齬不堪

也遂以積忤時上疏乞骸骨再起福建再乞休故事  
凡以病賜告病已得召用若進官即不更出時遂加  
先生太常少卿致任意尼使不復用也先生性亢厲  
受不黨之氣狷然獨行與同鄉顏御史鯨孫觀察光  
祖並以氣伏一時家衣食裁足性顧慕義倡置田百  
畝奉社祭酒沈嘉則先生養其老既里居身擅文章  
之事然恥以其筆札資身樹交養聲名所從交游甚  
寡歲時往來惟老諸生朱一誠及羣從子弟數輩與

沈文恭公少同研席及文恭枋國先生意漠如也至  
垂死乃以一劍一書贈文恭曰別我老友初先生夢  
人與語君命若孔子至七十三竟無恙後二年奉川  
產一麟持獻郡中太守使吏來白先生曰吾其死矣  
未幾遂卒文恭銘其墓曰君持此道游于世宜偃蹇  
能卷猶可不卷辱將大故吾不悲其不合而幸其能  
卷雖然先生之不合天也非盡天也其善卷而去之  
果幸耶抑不幸耶悲夫

余嘗讀農丈人集論其文既詳言之矣至先生之詩  
靡而堅質而峭介然之色絕似其人足自成一家而  
先生顧欲然自謂于詩涉其藩未能窺其奧意專以  
其古文詞上追千載然則先生所欲然自謂不必傳  
者正其所必不可傳者也

木州嶺謠

為某妾  
婦作

莫登木州嶺嶺高天地迴悲風日夜深豺虎紛來騁豈  
無一心人上帝不曾省

一解

上帝不省妾有夫上帝不省妾有姑有夫不作庭上人有姑不作旦暮身一呼上帝怒再呼上帝嗔上帝聰明妾不辰 二解

知汝雖食花知汝雖茹草不食並蒂花不如合歡草嶺

脚水粼粼嶺頭石皓皓一死表吾真區區焉足道 三解

木州嶺下無名村中有石闕悲黃昏不願紅顏當日存  
但留白骨今人論風雨為汝冤葛藟為汝尊誰家婦滿  
人口木州嶺一何厚 四解

獨鵠篇

為馬節  
婦作

吾聞女荀郎四銜挂空壁衣帶柔自纏粉書不成畫文  
姬蓬跣何殷勤酸詞片片落高雲彈出笳聲對笳語莫  
遣河東夫壻聞白骨寧有知妾心良不欺使君慎勿前  
致詞獨鵠獨鵠使我危心不忍哭

自西渡至姚江作

夕發西關津薄烟冪洄渚安漫延其波無冒剛濤怒遙  
光忽暝滅歸翮亞相旅輕帆信雨飛坐久失煩暑山椒  
襟野燐夜深照石虎歷歷貴者封名卿入荒土去者集

灌木來者藝叢楚齷齪自有徒幽憂不如鼠

贈別黃說仲

長安陌上人如螳不辨風霾日常紫男兒無賴七尺強  
白晝相看昏黑似天台黃君洵且美赤城霞氣差可擬  
一經何足了吾生獨挈昂藏走燕市駟衍不作劇卒死  
碣石空宮入流水孤塾經年沒野蒿絕大鱣魚尺有咫  
由來倒屣都漫語英雄欺人那有此丈夫何處不伸眉  
何必侯門躡朱履况君正是青年紀萬事俱從雙鬢起

行矣黃君善自喜

太息行送姜太符黃門北上謁補太符嘗以言

謫廣昌邊尉既服闕乃北

太息復太息霜風疾如織急霰墮陰崖涕下不可拭英  
雄流浪若漂梗神采不發空項領憂來七箸忽欲墮且  
爾進前呼舴艋我自揶揄人人亦睚眦我何能剖向渠  
許大真礪砢往年曾問昭餘祈可憐無水照鬚眉飛狐  
關外黃鼠肥朝舖夕舖徒自嘻量移忽經具區澤皇天



降割真太迫草土微臣祇皮骨扶向人前欲誰藉長安  
道上多倥傯不似當時行步工湛盧黯慘色屏營天子  
正坐飛廉宮飛廉可望不可即羈旅傷心看列戟狂靈  
終歲沈薊丘易得蹉跎在京陌丈夫如海任流澌安能  
窮守妻與兒雙眸浩蕩有如此得意雲霄竟是誰

傳侍御行

有叙

傳御史言事得罪詔杖謫戍定海徐給事喬李二  
御史俱以奔救貶官三等徐信州人與余厚善

傳御史纒綬都官正自此何獨東來泛江汜澤國荒唐  
泣秦陰絕與周廬不相似山川呵護縱有靈已走風塵  
四千里今人皆言御史好君為御史官不保信州給事  
我友人急難疾于風雨蚤喬君李君真丈夫憂來萬事  
青天孤乃知富貴不足有昨日內召今泥塗禺臚之神  
黃帝子掌我東海萬年祀歲歲馮夷供肅將玄幢出沒  
波濤駛蛟螭充巨割鼉鼉當小鮮江豚紛百拜冥窳贊  
大賢焦釜漏無極柱在洪荒前綠字大于斗高頌三山

鐫駮爾聞之魂直灑君來對之何不可爾時溟漲倍往  
日天吳橫決崩雷疾水府茫寒未易尋咫尺吁嗟風又  
失燭龍之事毋爾為又況不在東南陸崑崙使者傳雙  
翼今年未訊扶桑枝勸君且飲東海水勸君且殮東海  
米朝廷恩數良已多放君白日來蹉跎

送戴仲德游秣陵得高字

烟雨積江臯江聲日夜勞春方闌浩蕩客自美遊遨六  
代存黃鳥千山上白袍古人都寂莫轉使酒杯高

贈陳處士

古道已嶙峋，鴻濛信有真。  
樂貧甘一世，守拙讓千人。  
有酒堪彝鼎，無名自鳳麟。  
因憐抱甕者，終日漢江濱。

浦口別周國雍戶曹

卒卒竟何情，靡靡自不平。  
亂山高執手，孤樹遠吞聲。  
精爽邀鴻鵠，芳香托杜蘅。  
那能輕此日，不與重吾生。

少司馬范公邀遊谿隱二首

杳杳知何處，飄飄不自持。  
精神知地別，耳目恨來遲。  
莽

蕩千峯出虛空萬象披晚來嵐氣合不辨有推移  
窟宅儼仙真雲霞亦是塵山川勞起伏日月借嶙峋大  
海遙光起高空爽氣新薄寒猶戶牖清夢滿松筠

魯橋村

半景臨墟塢雙榆闌里門秋風吹巷陌落日散雞豚野  
外桑麻澗山中父老尊喧喧村釀集賽鼓正黃昏

沈嘉則李賓父攜尊枉餞賦別再用涯字

君意尊巖近吾心道路賒暫時燒短燭一醉失天涯烏

柏全無葉款冬正著花更欣篇翰好多贈不為奢

雨後灘行

雲帆未可賒雨外更天涯日日繇蠻鳥山山躡躅花松  
根青牒子溪水綠人家見說灘頭濁朝來幾尺沙

從張大司馬湖上雨歸

冒雨憐子邁從公又雨還萬山知汝健雙屐笑人閒窮  
海玄陰積空堂朔氣班登樓高自遣猶得俯塵寰

輓楊憲長

前路明如畫如公未可歸山川紛雨泣天地忽霜飛博  
碩皇家幹丰稜海國威無端雙白鬢坐使萬情違

癡絕一首示文融

霜影無端白烟叢有意青漫將閒歲月強作老娉婷苦  
縣人難遇雍門淚易零生來癡絕甚肯使一朝醒

汪長文治具湖堂對菊

逸興大湖飛蒼茫上白衣地行人共老霜與菊同肥遠  
氣通秋壑幽暉散夕扉杯行天漢轉直犯啟明歸

聞祝曼期客燕都寄贈

九霄空濶若為諧漫說長安十二街  
醉後只曾談古俠  
飢來絕不告吾儕  
有時偏袒金襴袂  
何地狂呼繡纈鞵  
曩日諸豪都莫問  
夕烟衰草自荒厓

九日沈徵父周國雍二選部邀遊清涼山寺

指點禪關處處清  
偶因佳節作山行  
無端秋滿祇陀樹  
有漏人投舍衛城  
白草不知殘照合  
青山忽放大江平  
此中舊事君休問  
我輩今來足主盟



七旬生日蒙諸君詩贈奉答兼有追慨

寂寂寒灰故不然  
星星宿火絕無端  
齒牙未必真相借  
髀肉何須苦自歎  
曠日行空都莽蕩  
閒雲在水自汎瀾  
故人真是天留住  
不記田間舊竹冠

愁來何事好開襟  
微雨初收正薄陰  
百道詔書山海使  
萬年天步野人心  
黃河命脈安如昨  
紫塞風烟淨到今  
太祝祠官俱望幸  
幾時清蹕翠華臨

世事何曾賴木強  
俗情端不羨疎狂  
從來一節堪天壤

未必千秋在廟廊  
海谷投竿雲總綠  
江壩披襖雨初黃  
看來不是神仙相  
琥珀空勞發夜光

送包明臣之任潮陽簿

閩甌南並古明州  
莽蕩風烟漲海頭  
溪水腥常作霧  
枕椰葉暗不知秋  
琵琶洲畔蛟為窟  
甲子門前蜃是樓  
只有羅浮山色好  
蕭齋長得破孤愁

送定于柴公觀察江右

曠度長才總總殊  
早從茂齒握專符  
雲深廬嶽飛長瀑

大盡鄱陽出大孤青帝元神開首路蒼生大命在前驅  
殷勤更切平生淚未敢臨風洒白氈

舒倩入閩懷贈

翠水蒼厓鬱未開君從何處訪蓬萊桓伊得意唯三弄  
畢卓埋聲祇一杯葢寇有香閩土在鷓鴣無夢越王回  
有人地下都相恨何日封泥到夜臺

沈嘉則見過賦贈

園林初霽較精神扶杖來過滿地春故作烟霞供鳥語

急收風雨為花噴，踈篁入戶間。相得片石當軒狎，幾巡  
慣著緋袍憐白髮。尊前更比絳桃新。

侍司馬公發曠晦至茂嶼十六韻

遵渚有餘清，看人白鳥明。遙分平野色，乍入大江聲。旋  
旋空濛失，嶷嶷積翠生。短檉當岸立，老鶴逐陂行。進艇  
枯河澀，扶筇絕巘輕。危巒駭別榭，神瀆墮前楹。日月頻  
揮擲，山川暫合并。雙眸凝不極，一嘯意難平。壯志聽鶡  
鳴，高懷訊杜蘅。交情多嶮巖，世事太縱橫。珍重鮪魚膾。

尋常竹笋羹奕過天再旦卧至日西傾有地恣幽討無  
時解宿醒乾雲栖老石苦霧罩荒坪萬慮緣于俗千年  
好是名滄洲鷗鷺在敢愒舊時盟

遊四明山二十四韻

澤國高寒氣秋旻廓落情山經標特勝仙籍多多旌凌  
厲眇三島遵循隘九瀛剛風鼓蓬勃朗宿錯經營窈窕  
谿初發趙趙嶺欲驚翠濤儲萬斛紫霧幕千楹瀑迅昨  
宵雨雲乾此日晴祥羊愁躑躅俊鵲快縱橫珞球開屏

勢琮琤引吹聲八紘真汗漫五岳浪鏗鉤自作擔登去  
難論戴釜征葛洪原有約禽慶獨何名孤嘯神霄半雙  
眸大海平華旛通太乙藜杖倚長庚鳩鵲遙相劈鷓雞  
午乍鳴青菁炊作餉白襪裹為程喜劇歎氛絕驕多裕  
袂輕紆行蛇出谷小坐雁分坪矯首徇靈塔緣袂聳化  
城芝童紛出矚毛女悅來迎許寂劍何往劉網榭已傾  
荒荒都信足默默但盱衡猶隘寰中在何時海外盟幄  
豐應咫尺薦我以雙瓊

哭思賢王中丞絕句

漲海連天無盡期，子胥日夜泛鷓夷。  
西風作浪鯨鯢泣，潮去潮來總自知。

曾提一劍大荒西，落日旗翻太白低。  
石馬墓前高幾尺，蕭蕭風雨夜聞嘶。

渡滹沱

一片桑乾水氣昏，白雲空磧大河吞。  
馬頭帶得衝星劍，夜夜回看古薊門。

沈肩吾太史屠田叔比部餞別郊外時余下第  
東歸

劇人最是艷陽天何地春光不可憐君自慨慷吾自醉  
忽無言語只揮鞭

沈嘉則客海陵于高生之往也作絕句寄焉

白髮毵毵映水遙一生長寄木蘭橈蓬萊山下深無極  
聞道年來只及腰

後夜長虹下燭溪寒江不動萬峯齊楚天只在繁星外



一望同君一倍低

送李廉甫節推鳳陽

海薄峯迴龍虎扶古塗山國是中都此間父老今何似  
定憶高皇舊賜脯

甬上耆舊詩卷十九

欽定四庫全書

甬上耆舊詩卷二十

監察御史胡文學編

石孟山人汪仲安先生坦

先生號識環中丞雷峰先生子也少擅異才於書無所不讀初爲諸生應省試筮得蠱之上九慨然有遺世意因作高尚賦以見志婦翁太宰聞莊簡公先生以太學生至京師聞公方在天曹先生深自匿恥借

太宰爲重足跡不輕踐其庭聞公貽之尺牘報書率  
言國家生靈休戚大計無一語及兒女寒暄其志操  
乃爾既稍以門資歷官藩幕雖在簿牒間未嘗一日  
廢書所至輒登覽蒐古凡作吏十餘年非其所樂也  
遂解組歸先生家在大雷山下距四明在程几間構  
屋山椒爲層堦漸躡漸高嘗臨堦下俯與樓上人語  
高雲宿棟飛泉夾坐有至者如入仙都洞府先生日  
吟嘯其中盡以詩法教其子禮約復使遊于沈嘉則

先生之門嘉則遊四明從大雷入先宿汪氏山房先生父子出黃雞白韭作供共討論四明故實三日夜燒燭傳覲主客懽甚至今稱爲盛集先生遺詩楊伯翼所選定屠長卿序之

日東出

日東出駕六龍卿雲從翔天中日東出開八埏龍之飛  
羣蜿蜒日東出玉燭明屢豐年樂和平

獨漉篇

獨漉獨漉上山入谷山有猛虎谷有短域上山采紫芝  
下山采黃獨姑芝可延年青崖騎白鹿四海覽遊遨人  
命如轉燭雕獸當九關月星晦漫漫當闕關不守金印  
繫左肘肘後不須史鬼火燒白榆

君子有所思行

君子有所思所思邈不期入室各自媚出門寧復知吐心尚  
告誰噂沓欲何為野田飛黃雀高不過蓬茨赤鳳搏紫霄文  
采光陸離鯨鯢困泥滓螻蟻尚制之螻蟻細小蟲從橫亦惟時

董逃行

倬彼雲漢昭回天門醮祭夜開金旌寶幢徐來玉女三  
千裴徊中直層臺仙掌崔嵬侍臣跪進瑤杯一解

鶴馭臚臚中宵來下但俾吹笙擊鼓姤女翩翩起舞神  
水金波如組二解

黃扉夜啟霏霏元老踈踏裳衣香龍蜿蜒金泥青詞繡  
楮揚輝天顏一展申眉三解

城南尺五綢繡歌臺暖響續紛車如流水盈門苞苴山

海輸珍千秋萬歲長春

四解

紛紛疇犯教言履客日稱萬年白日胡薄重淵但願勿  
令華顛子子孫孫駢妍我生有命在天

五解

### 短歌行

甘言為疾苦言藥促膝就耳姿綽約言才逆耳心不樂  
胡不甘言恣歡謔頃刻垂楊生左肘盼睐何人為奔走  
平生不識夷門叟白髮人前向人剖短歌行莫垂手

行不得哥哥

興隆道中  
聞鷓鴣作



行不得哥哥魚潛毒淵鳥栖惡柯此無奈何嗟爾行人  
趨趨阨陀不避罽羅天無三日晴地無三里平六龍之  
山十年爲兵君將安行嗟嗟君將安行

別泰山擬唐李白

錄三首

自我來泰山于今忽五年每登日觀峯並坐肩吾軒方  
瞳被兩鬢宛若垂雲烟佩服龍門衣霞彩光矚然謂我  
畏壘山曾共桑庚眠重來五千載一笑俱忘言而乃天  
仙姿疇能識毫顛既來不須史又復歸滄田攬衣不能

下淚下如流泉

青霞四千丈誰能陟其顛倒騎白鹿行去若飛龍  
遶道逢五丈人峩冠向余前所論俱上古蒼顏不知年  
自云秦皇帝登封污遺編至今地天通無能伏其愆  
顧子偃僂軀不揖霞宮仙自非生平力安能獨超然  
行行重相期贈子華胥軒明滅不可覩黛色參中天

崩湍落兩厓風雷日喧飀飛梁十萬丈健倒青莓苔  
洞門開石扇照耀金銀臺蘭楣桂爲楹白玉三重階  
貝瓦

碧參差珠箔光皚皚琪花襟瑤樹鸞鳳舞氍毹坐我紫  
霞床酌我青金壘瓊漿一漱齒神靈通百骸逍遙游象  
罔蕞爾遺塵埃滄溟連渤海歸去何時來

弘濟寺觀音閣

高閣闌危湍結構歷機巧昨聞靈谷勝還茲足幽討倒  
影射虛牖照我顏色好遠翠凝不流江光白如掃清楚  
飄天風奇巖寄瑤草遐憶羲皇人悠然此懷抱

夜上嚴州灘

金少府八十一言  
卷二十  
上灘似牽羊下灘如走馬灘高月未出石立灘流寫參  
商欲低擲風雨聲在下夜半入天津應識支機者

燕山行

燕山八月風吹雪北酒壚頭點猩血美人高坐碧璣瑜  
手撥琵琶唱頻闋銀鐺燒出紫駝峰華燈夜剪青蓮月  
蓮花旋舞金蓮蒂鴛鴦繡幕流蘓陸頃刻能開上苑花  
逡巡笑綰章華臂年光逝水人間擲昨日纏頭今不識  
絲鞵寶匣出長楊皓齒蛾眉復東陌東陌西樓秋月明

十二闌干曲曲凭，  
緱山玉女烟霞上。  
悔不當年學鳳笙，  
王主簿邀過海神廟。

海風一夜吹茅屋，  
海客披襟坐幽獨。  
主人邀客過南澳，  
兩馬蕭蕭携兩僕。  
滄溟紺色浮坤軸，  
晴空峭影含蒼玉。  
頽垣破瓦織茅束，  
短衲容枯如鬼髑。  
靈旗不閃祠無木，  
毒龍上天原有犢。  
鯨含鼉作波神逐，  
潮平日落山魃哭。

泰山俯仰亭

海右名亭在無如此，  
獨高八鴻來蕩蕩。  
千古去滔滔斜。

日明巖雪長風吹布袍有懷渾莫語搔首誦離騷

夜登泰山

豈有王猷興衝寒夜上顛白雲俱墮地明月自行天萬里風何限千尋嶂獨前最憐肌若雪皎皎藐姑仙

春日新晴山行

細雨彌旬久東風喜乍晴鶉啼松葉紫雉雛麥苗青日墮雲間影泉流石上聲生憎蕉葉醉不挂一錢行

高郵湖

西風吹五兩短棹未須牽  
遠樹猶懸日平湖但有天  
蕪葭隨意落鴻鴈識期先  
俯仰曾何慮長歌秋水篇

宣風館用陽明先生韻

雨沃新苗翠已痕石溪曲曲正流渾  
千山淑氣開南楚十里鶯聲自一村  
未有涓埃霑白屋漫留燈火照黃昏  
羅施升斗還叨竊慙問湘纍萬古魂

壬戌九日岱祠城樓

久矣蓬元坐碧霞登臨猶喜思無涯  
千年樓閣初成賦

萬里風雲一放查天上三漿俱綠髮人間九日有黃花  
飄飄已結王喬侶不向龍門數孟嘉

六月十三夜月

空山無暑坐清宵牛女星河入望遙此際獨憐初月淨  
移時未必片雲消涼颼颯動來天閣愁緒分明到野橋  
四十年前傳盛事白頭箕踞說漁樵

新泉

瀟澗澗水深新泉出崖底日夕山童歸傾筐洗石耳



螺羹

榆葉如錢柳葉齊  
菠稜生菜滿青畦  
小鐺正煮螺羹熟  
檐外游絲拂面低

幽叟屠田叔先生本畷

先生號漢陂自爲兒  
即異父少司馬竹墟公甚愛之  
以任子授刑部檢校  
稍遷太常典簿因撰太常典錄  
記國家郊祀大典時  
比諸唐王涇郊祀錄  
宋文彥博大饗明堂記  
歷遷南繕部郎中出爲兩淮運同復移

之閩先生在官以廉白自持政暇起祠烏石山祀諸  
先賢立社學水口以教子弟受經者三年拜辰州太  
守辰居西南徼襟蠻風先生以寬仁治之辰人大悅  
適播州皮林俱用兵使先生主餉轉輸不乏事平敘  
功第一而先生顧以喜客門外車騎交錯後堂日置  
酒當事聞之不喜乃移書先生父執謂田叔家有園  
亭絲竹足樂賓客此吏事不足苦田叔竟罷先生歸  
初先生在郡禁殺牛有唐生具牒言家貧蓄一牛不

幸猝死請鬻其肉以糊口先生知其給也判以俸買牛葬之比牛至果生因命小吏戴養之及先生解官衣深衣騎馬出門辰父老泣相送牽牛隨其後先生屬吏善養牛終其年時人爲作辰陽留犢圖一時傳之先生踈眉目廣顙而哆口人望之若神仙生平惟喜讀書至老尚手一卷人或曰先生老矣奚自苦先生曰吾于書飢以當食渴以當飲欠伸以當枕席愁寂以當鼓吹未嘗苦也晚年其喜客益甚客至必出

魚韭無列席飲不過數勺然每觴客必盡懽所言未嘗及世事間作諧語一座爲傾先生既老起生壙于甬上撰狀及表自稱曰慙先生一時詞家俱奉爲祭酒先忠毅公常過先生客數輩時山陰王季重少年在坐曰先生昨酒中許填南北詞相贈已成否先生笑言曲已半方疊下愛王郎句即唱之時先生已八十餘發音高亮客俱絕倒其風流可見也

### 三婦豔

事秦箏趙瑟空自傷世上浮名亦徒爾安有五侯七貴  
能文章腹中貯書一萬卷一字不得用勞我肝與腸勸  
君無言舌且藏誰能以此錦繡段燒之慎勿當風輕自  
揚

不必行

騎不必紫驂騮交不必豪俠遊驂騮世上空有聲豪俠  
世上空有名不如我自爲我卿自卿世上方能稱太平  
我亦千金曾結客如今客反向我射我亦四座客長滿

如今客反誚而筦我今無言客且歸勸客弗嗔我所爲  
歌且謠行

我吟梁甫聲獨楚梁甫不知我心苦我歌黃鵠心悠哉  
日暮黃鵠期不來長嘯六博呼五白會須千金輕一擲  
雞三足兮馬生角物論何曾久歸著乃知天地之間無  
弗有不在卮談與杯酒詩書禮樂徒空言其人與骨皆  
已朽我乃因之亦俛首

前有尊酒行

前有尊酒起爲君壽君壽高如陵我酒多如澗如澗之  
酒清且旨君心不保能終始君心終始那得知如澗之  
酒空自治上有明月不照汝心前有尊酒徒勞我斟君  
不見一言不合干戈起只在殷勤一杯裏魏其武安今  
已死千古相爭竟誰是我今不言君且止

潮生曲

潮生君未來潮落君又去來去總無常勞勞西江渚江  
渚月明朝又回郎行那得好懷開來朝試看天邊月不

待潮生蕩槳來

火樹篇

瑤城火樹鬪春妍  
瓊藥參差簇絳天  
謾詫燭龍隨法仗  
始知火宅種紅蓮  
流烏飛去難藏日  
么鳳翔來不避烟  
恍若流蘓開甲帳  
乍疑瀑布瀉溫泉  
五綵宛轉同心結  
七寶妝嚴太乙船  
灼爍大槐枝不藝  
紛披熠燿草如然  
木難火齊垂高下  
金彈銀丸去後先  
縱是落花空點水  
任教拾翠不爲鈿  
朱祿翠眊迎中婦  
靈鵲金鳧引上仙



絕勝庭栽多寶樹來供客醉綺羅筵光分萬戶星初落  
彩散中宵月並懸君王不愛魚龍戲詔罷今年少府錢

無題

當時月戶易流連今日雲窓更可憐慣弄參差迴鳳管  
愛歌婉轉動鶉絃鏡屏斜倚星爲海藻井新成錦似烟  
並蒂鶻間開笑靨合歡樹上鬪嬋娟情波頻送將留夕  
恨葉難飛欲曙天條脫藍絲仙子贈珮環極浦漢妃捐  
額黃鈿翠生憎染桂火蘭膏自喜然燦燦已曾遺角枕

飄飄且莫上蓮船來從曲曲千林下去隔盈盈一水邊  
何處瓊瑤何日報手中芍藥夢中傳

病宮人詞

一入君門誤守宮低徊那敢怨東風儘教買賦黃金在  
留與他人贈畫工

述遇

由來抱影士沈默葆精光當其發幽吟列坐遜高唱芳  
草有宛弱采采日以香白雲無去留披壑成文章奚必

待靜好在御始琴張何事自結束期君以曛黃曛黃難  
久期泪下不可揮

寫懷

獻歲始發春吾將遵歸轍媯媯白藏至猶然昧初服髭  
髮不護人剡其來向白䟽麻居然改遺遠將誰適豔歌  
何可嘗坐令歲華迫善御非良工善鞭非良策不如紉  
幽蘭芳馨以自憚

吳娃

吳娃如白雪粧成薄膏澤若使吳王見不愛西施色西  
施入吳宮吳俗遂成風至今閭門女效顰安可窮魚戲  
蓮葉北儂住蓮葉西閭門三五夕流月到耶溪

寄白門

二十餘年別舊京山容水滌轉含情春從燕子磯頭媚  
月到烏衣巷口明憑風寄信藏烏處楊柳如今幾樹生  
同杜蒼舒入大雷山訪汪長文

重來尋谷口萬壑轉分明楓葉蕪山赤嵐光接澗平香

生椽粟飯霜老芋魁羹避世他年事誅茅共此生

同余丙仲泛城南陂二首

泛賞下南陂舟行日自移千林懸紫籜十里卧青鷺  
進渚將吳舫行歌命楚兒誰能鼓桂楫頃刻到天池

宛轉度江城平田見水耕遠從青鏡轉輕載白雲行  
浦樹平于席林禽囀似鶯滄浪隨處好于此濯吾纓

鷓鴣

鷓鴣南方鳥如拳語未開入燕吾始見踰濟衆相猜碧

眼愁鷹隼清秋憶草萊最能關氣候占望獨徘徊

白鷗

栖栖白鷗鳥容與鷺鷥羣金距曾凌漢朱冠亦切雲  
文章殊自喜黑白總能分一被青絲繫終年憶水濱

會稽道中少憇

鳥道紆回入千巖綠樹低轉留空翠處少憇石橋西  
別澗潺湲瀉叢林桑扈啼坐看鳧與鹿引子過前溪

感事

十載憂時淚今年洒更多前星宵漸遠邊檄日頻過無  
計舒蜩臂空懸扣角歌素餐吾却愧爲日已蹉跎  
況值龍蛇歲躬逢離亂愁世平清議重時至杞人憂上  
策收豪俊天心叶聖謀不過嚴賞罰尅日偃戈矛  
憶罷朝叅禮優游已四年我皇非自逸借箸每難前卒  
悍竿旗揭民貧室罄懸恨無經濟術矯首問高天  
天子資清穆羣亮起綠林支離天下事激切小臣心箕  
服尋常艷交梨不可尋三年占象緯脈脈到如今

入會稽

會稽稱大郡風壤舊京華  
綠水滌南鎮高城遶若耶  
郡中輸竹箭山上起官衙  
但恐芳蓀歇扁舟問浣紗

次攜李

暮雨飛仍急飄飄攜李船  
重雲不歸海積水自浮天  
捩舵鴛鴦濕聞香菡萏偏濁醪  
吾已醉隨分過澄川

賦得的的帆向浦

大舩乘風駛孤帆向浦經  
浮雲憑浪白暎日借鳧青空



濶開沙嶼迢遙接水亭采芳湖上去倘可遇湘靈

雷塘

揚州城北寺廿里到雷塘輦路銷金粉春風散綠楊山  
精古墓集官栢鬼車藏落日遊人歇蕭條古帝鄉

甲午元旦風霾異常私成口號

矚目當天正終風日又西四郊烽未靜朔日霧全迷勢  
欲三山動聲兼萬馬嘶老魂驚易散長恐謝青溪

作客身驚老無家鬢益踈獨將元日事來卜五行書天

上翻星鷁雲間殷日車有詩聊自託不敢違宸居

題畫

峭壁披天棘通林壓海榴亭中人獨坐門外水長流鹿  
小羣分曠翁衰自飯牛亂雲堆几席點綴與沙鷗

任城太白樓懷沈嘉則

高樓一上白衣寒戶外朝霞正可冷明月關河無濁酒  
故人天地有黃冠謫仙去後誰能似彩筆年來老自看  
若是五湖堪避世爲余天際報飛翰

夢中得亡友楊伯翼書覺而悵然記之

吾友楊伯翼謝世二載矣乃辛卯孟冬十二  
日夜夢寄三十字于余曰承鯤無恙近居甌  
洛山中見黑黃二鸚鵡弟設置弋已得其一  
黑矣黃未獲也題封宛然字字淒楚覺而悵  
悵不勝人琴之感賦此

夢裏開械淚欲潛驚回梁月似君顏三年書札悲今昔  
一夕精靈託往還却恨帝京爲下吏不知甌洛在何山

鳧鷖鷓鴣終難辨蝴蝶飛來栩栩間

丙戌秋上陵

君王寢殿鎖山椒肅肅瑤城枕玉橋廿里松楸微漏日  
九天雲霧盡飛濤燕山御氣時時度幽府神祇夜夜朝  
穆穆千官措笏處若聞靈佩下清宵

雨不絕

三月中林烟霧饒青鳧白鷺未堪招雨聲不絕淋漓夜  
花事終違十五橋濕重角巾頻欲折江寒石燕故相驕

邇來別有牢騷感回首交遊總寂寥

甬東江北歌

春樹重重春日和春江九曲抱城過龍頭直接桃花渡  
燕尾斜穿上字河

迢迢沙阜是梅墟面面澄江盡可廬不盡石帆奔海月  
春風煦網稻花魚

百十魚鱸下海門布帆五色若雲屯甬東北岸鄞江上  
習習腥風五月繁

犁鋤荷鋤種春苗  
蠶豆花開春正饒  
十里清溪鴨寨堰  
萬株蒼檜麥楊橋

桑柘林中綠漸敷  
村村花暝喚提壺  
江風日冷忘歸去  
猶有斜陽滿鴈湖

夫差破後已亡吳  
曾說清江駐舳舻  
惟有輅林猶似昔  
千門落日自啼烏

題畫

鷗鷺何綠下  
急湍颶風零  
雨不勝寒  
如今好向澄江上

月白沙明十二灘

入山

醉弄潺湲日未斜  
更從看竹過山家  
坐來春色深如許  
開盡峰前躑躅花

月下獨往四首

以下  
老言

先生自言其詩凡三變  
早年尚正聲故多嘽  
緩中歲更尚氣節似饒遠  
韻老來漸知律細  
益愛清真因題其七十以後詩曰老言別一

卷余更爲選錄十首不雜于集中使學者知  
詩人氣候未有不善變而能工者也

獨往親明月微吟過小蹊偶然思老伴還與話幽栖雲  
影渾無恙星光燦欲垂無人同領畧歎息此前溪

投老逾耽僻從人笑裋衣松花新著飯月色白臨扉萬  
籟欣皆寂吾生興不微尋常三五夕幽獨易忘歸

丙夜未成眠天衢步悄然影非緣我獨光自使人憐圓  
缺者今夕升沉感昔年弄簫者誰子吹過水樓前



西閣與東林徘徊意自深  
腥嗔烏鬼叫涼待白榆沉竹  
長新增媚匏存久不斟情來還蕩漿  
豈爲訪山陰

月下後獨往時病起

選二

肺病晚涼踈清光半綺  
疏苦吟忘禮倦緩步覺眉舒  
有月窺虛牖將誰問起居  
人家已深睡夜色不關渠

經旬巾廢櫛永夜戶長開  
僻喜孤能往幽知老未頽  
月痕臨水淨鶴夢待更回  
無怪比隣老停眠竟夕猜

九日李實甫別駕惠名酒

偶似淵明隱歸從粟里開囊萸青嶂返送酒白衣來斟  
酌吟詩伴招邀待月杯使君有佳餉那可獨醒回

生意

四月黃魚市風腥海客場  
艤艫凌出沒喧雜起帆檣  
天遠銜山小江深激浪長  
廿年投老計生意問漁郎


病齒少瘥值歲除日強事巾櫛便往城東看迎  
春約管無棘家凌元姪

除歲多時憂採薪婆婆今得裏烏巾却因齟齬殊難笑

翻對蛾眉也不伸檢歷盡銷支藥帖烹葵獨向灌園人  
相期興自迎春發東陌行看綵仗新

偶然作效唐白傅體

短褐芒鞋紫籜冠江臯步履未蹒跚少爲掾吏稱三語  
老愛蹲鴟飽一枰草閣獨憑無厲屐蕭齋寄傲有猗蘭  
桃花酒舍今稀過不遣傍人爲索癩



甬上耆舊詩卷二十